



RASMI ... Tuan Ahmadshah memalu gong bagi merasmikan Pesta Tamu Gadang UMS sambil disaksikan oleh Dr Abu Hassan.

Graduan UMS meningkat 200 peratus

Oleh JOHN TAMBANAN

KOTAKINABALU: Pesta Tamu Gadang kali ini menunjukkan peningkatan hampir 200 peratus graduan Universiti Malaysia Sabah (UMS) diraikan berbanding Tamu Gadang yang pertama.

Naib Canselor UMS, Tan Sri Prof Dr Abu Hassan Othman berkata, pada tahun ini, seramai 2,227 graduan akan diraikan dan akan mengikuti majlis konvokesyen keenam pada 12 dan 13 September ini.

"Tamu Gadang pertama UMS pada 7 September 1999, hanya 226 graduan diraikan, tetapi kali ini jumlah itu meningkat hampir 200 peratus," katanya ketika berucap pada majlis perasmian Tamu Gadang sempena konvokesyen keenam UMS dan sambutan ulang tahun ke sepuluh

universiti itu, kelmarin.

Majlis itu disempurnakan oleh Yang Dipertua Negeri, Tun Datuk Seri Panglima Haji Ahmadshah Abdullah. Hadir sama pengerusi Lembaga Pengarah UMS, Tan Sri Abdul Hamid Egoh dan Timbalan Naib Canselor (Hal Ehwal Pelajar) merangkap pengerusi Tamu Gadang UMS, Prof Datuk Dr Mohd Noh Dalimin.

Katanya, kelangsungan UMS sehingga ke hari ini adalah hasil sokongan, keprihatinan, bantuan dan kerjasama padu semua pihak khususnya kerajaan.

Untuk itu katanya, UMS akan terus berusaha mencapai kecemerlangan dalam pelbagai bidang sama ada dari sudut pembangunan pelajar, akademik, penyelidikan, pembangunan kakitangan dan juga pembangunan fizikal kampus.

"Dari sudut pembangunan akademik, penambahbaikan terhadap kursus dan program pengajian universiti akan terus dilakukan bagi memastikan ianya sentiasa bersifat 'market driven'.

Kecemerlangan, ketrampilan dan sahsia pelajar juga akan terus diberi perhatian," katanya.

Katanya, sejak sepuluh tahun lalu, bilangan pelajar yang mendapat kelas pertama semakin meningkat.

Begitu juga katanya, dari segi aktiviti sukan dan ko-kurikulum, pelajar universiti ini telah menunjukkan keupayaan dan ketrampilan untuk bersaing dengan pelajar dari universiti lain.

Beliau memberi contoh, pasukan debat UMS yang telah berjaya menjadi johan Debat Di Raja tahun lepas dengan mengalahkan 17 institut pengajian tinggi awam (IPTA).